

"Službeni glasnik BiH", broj:51/12

Na osnovu člana 9. Zakona o duhanu Bosne i Hercegovine ("Službeni glasnik BiH", broj 32/10) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), a na prijedlog Ministarstva vanjske trgovine i ekonomskih odnosa Bosne i Hercegovine, Vijeće ministara Bosne i Hercegovine, na 7. sjednici održanoj 10. maja 2012. godine, donijelo je

PRAVILNIK O UVJETIMA ZA PROIZVODNJU DUHANA

POGLAVLJE I - OPĆE ODREDBE

Član 1.

(Predmet Pravilnika)

Ovim Pravilnikom uređuju se:

- a) uvjeti koje proizvođač mora ispunjavati da bi se bavio proizvodnjom sirovog duhana u listu,
- b) uvjeti koje organizator proizvodnje ili obrađivač duhana mora ispunjavati da bi se bavio proizvodnjom ili organizacijom proizvodnje duhana, i
- c) vođenje evidencija, kao i prijave proizvodnje i procjene prinosa.

Član 2.

(Sadržaj, oblik i način vođenja Registra proizvođača duhana u listu)

Sadržaj obrazaca i način vođenja Registra proizvođača duhana u listu u Bosni i Hercegovini propisuje ministar vanjske trgovine i ekonomskih odnosa Bosne i Hercegovine, u skladu sa članom 36. Zakona o duhanu Bosne i Hercegovine (u daljem tekstu: Zakon o duhanu), Registrom poljoprivrednih gazdinstava i/ili Registrom klijenata Bosne i Hercegovine, propisanih Zakonom o poljoprivredi, prehrani i ruralnom razvoju Bosne i Hercegovine ("Službeni glasnik BiH", broj 50/08).

POGLAVLJE II - UVJETI ZA PROIZVODNJU DUHANA

Član 3.

(Ugovori proizvođača duhana)

- (1) Ugovor o proizvodnji duhana, sklopljen između proizvođača duhana i organizatora proizvodnje ili obrađivača duhana, mora sadržavati sljedeće elemente:
 - a) podatke o katastarskoj čestici i površini poljoprivrednog zemljišta na kojoj se sadi duhan,
 - b) naziv tipa i sorte duhana koji se sadi,
 - c) način na koji ugovorne strane osiguravaju sjeme, odnosno duhanski rasad,
 - d) obaveze u pogledu primjene mjera za suzbijanje biljnih bolesti i štetočina na duhanu, te primjene ostalih obaveznih uzgojnih mjera,
 - e) cijenu proizvedenog duhana po klasama koju organizator proizvodnje ili obrađivač duhana plaća proizvođaču,
 - f) obavezu organizatora proizvodnje ili obrađivača da otkupi duhan od proizvođača u skladu sa Pravilnikom o vremenu i mjerilima procjene kvaliteta sirovog duhana, a u skladu sa članom 14. Zakona o duhanu,
 - g) obavezu proizvođača da u ugovorenom roku organizatoru proizvodnje ili obrađivaču duhana s kojim je sklopljen ugovor o proizvodnji isporuči sav proizvedeni duhan, te obavezu organizatora proizvodnje ili obrađivača duhana da od njega preuzme i plati mu proizvedeni duhan,
 - h) izjavu proizvođača duhana da za isto vremensko razdoblje nije sklopio ugovor o proizvodnji duhana sa drugim organizatorom proizvodnje ili obrađivačem duhana za istu površinu iz tačke 1. ovog člana, i)
 - i) rok i mjesto predaje duhana, i
 - j) rok i način isplate novčanih sredstava za preuzeti duhan.
- (2) Ugovori o proizvodnji duhana između proizvođača i organizatora proizvodnje ili obrađivača duhana sklapaju se na vrijeme od godinu dana, i to najkasnije do 30. juna godine u kojoj se proizvodi duhan.

Član 4.

(Upis u Registar proizvođača sirovog duhana u listu)

- (1) Proizvođač duhana u listu obavezan je da izvrši upis u Registar proizvođača sirovog duhana u listu 15 dana nakon potpisivanja ugovora iz člana 3. stav (1) ovog Pravilnika.
- (2) Upis u Registar proizvođača sirovog duhana u listu treba obnavljati svake godine, na osnovu novog ugovora.
- (3) Način upisa u Registar proizvođača sirovog duhana u listu propisan je Pravilnikom o sadržaju obrazaca i načinu vođenja registara, u skladu sa članom 36. Zakona o duhanu.

"Službeni glasnik BiH", broj:51/12

Član 5.

(Evidencija sklopljenih ugovora)

- (1) Posebnu i urednu evidenciju o sklopljenim ugovorima o proizvodnji duhana vodi organizator proizvodnje ili obrađivač duhana.
- (2) U evidenciji o sklopljenim ugovorima organizator proizvodnje ili obrađivač duhana mora imati stalan pregled sklopljenih ugovora, zasađene površine i broj ugovorenih struka duhana.

Član 6.

(Izveštaji organizatora proizvodnje ili obrađivača duhana)

Organizator proizvodnje ili obrađivač duhana na osnovu ugovorene proizvodnje dužan je nadležnom organu za poljoprivredu, u roku propisanom članom 11. Zakona o duhanu, dostavljati izvještaje o:

- a) broju sklopljenih ugovora o proizvodnji, sa podacima proizvođača,
- b) površini zemljišta zasađenog duhanom prema ugovorima i o očekivanoj proizvodnji,
- c) količini, tipu i klasama proizvedenog i preuzetog duhana, na osnovu ugovora o proizvodnji.

Član 7.

(Zemljište za proizvodnju duhana)

- (1) Da bi određeni proizvođač duhana sklopio ugovor o proizvodnji i isporuci duhana sa organizatorom proizvodnje ili obrađivačem duhana, mora imati zemljište za proizvodnju duhana u privatnom vlasništvu, ili ga koristiti po nekom drugom pravnom osnovu (ugovor o darovanju, ugovor o zakupu, ugovor o koncesiji, ugovor o ustupanju zemljišta na korištenje itd.).
- (2) Zemljište koje proizvođač duhana koristi za proizvodnju mora biti evidentirano u Registru poljoprivrednih gazdinstava Bosne i Hercegovine.

Član 8.

(Obezbjedivanje uzgoja ili uvoz sjemena duhana)

- (1) Organizator proizvodnje ili obrađivač duhana dužan je obezbijediti sve potrebne uvjete za uzgoj ili uvoz sjemena duhana proizvođaču duhana sa kojim je sklopio, ili namjerava sklopiti, ugovor o proizvodnji i isporuci duhana.
- (2) Organizator proizvodnje ili obrađivač duhana može obezbijediti samo ono duhansko sjeme koje je proizvedeno u skladu sa propisima o sjemenu poljoprivrednog bilja i koje je odobrio nadležni organ.

Član 9.

(Duhanski rasad)

Proizvođači duhana mogu, za svoje potrebe, uz stručni nadzor organizatora proizvodnje ili obrađivača sa kojim su zaključili ugovor o proizvodnji, proizvoditi duhanski rasad i/ili kupiti rasad od organizatora proizvodnje ili obrađivača duhana.

Član 10.

(Odobranje proizvodnje različitih tipova duhana)

Nadležni organ može odobriti proizvodnju tipova duhana različitih od navedenih u članu 2. Zakona o duhanu, ako se utvrdi opravdana potreba za proizvodnjom određenog duhanskog proizvoda.

POGLAVLJE III - KONTROLA I STRUČNO PRAĆENJE PROIZVODNJE

Član 11.

(Organiziranje stručne službe)

- (1) Organizator proizvodnje ili obrađivač duhana dužan je da u sklopu redovnih aktivnosti organizuje stručnu službu (koja pruža stručnu pomoć) i praćenje proizvodnje i zaštite duhana od biljnih bolesti i štetočina, kako za vlastitu proizvodnju, tako i za proizvođača duhana sa kojim je sklopljen ugovor o proizvodnji i isporuci duhana.
- (2) Fizičko lice koje pruža stručnu pomoć na zaštiti duhana od biljnih bolesti i štetočina mora posjedovati stručnu spremu diplomiranog inženjera poljoprivrednog smjera i najmanje tri godine radnog iskustva u proizvodnji i zaštiti bilja.

Član 12.

(Stručna pomoć u toku vegetacije)

Proizvođač duhana dužan je organizatoru proizvodnje ili obrađivaču duhana u toku vegetacije omogućiti stručnu pomoć pri ispunjavanju ugovorenih obaveza u pogledu kontrole i zdravlja bilja.

"Službeni glasnik BiH", broj:51/12

Član 13.

(Uputstva stručnih službi)

Proizvođač duhana obavezuje se da u toku uzgoja duhana sprovodi sva uputstva od strane stručne službe organizatora proizvodnje ili obrađivača duhana, počev od onih koja se tiču proizvodnje rasada, pripreme zemljišta, gnojidbe, uništavanja korova, zaštite od biljnih bolesti i štetočina, pa do onih koja se tiču sušenja i pakiranja duhana po insercijama.

Član 14.

(Sortiranje, pakiranje osušenog duhana i predaja organizatoru proizvodnje ili obrađivaču)

- (1) Proizvođač duhana obavezan je da, prije nego što ga preda, osušeni duhan čuva na pogodan način, i u odgovarajućim prostorijama, te da ga sortira i pakuje prema uputstvima koja dobija od organizatora proizvodnje ili obrađivača duhana.
- (2) Proizvođač duhana se obavezuje da sav proizvedeni i osušeni duhan preda organizatoru proizvodnje ili obrađivaču duhana u ugovoreno vrijeme i na ugovorenom mjestu.

POGLAVLJE IV - OBAVEZE ORGANIZATORA PROIZVODNJE ILI OBRADIVAČA DUHANA

Član 15.

(Cijene po klasama duhana)

- (1) Organizator proizvodnje ili obrađivač duhana obavezuje se da prilikom sklapanja ugovora sa proizvođačem duhana u svakom ugovoru navede cijenu po klasama duhana za otkup u tekućoj godini.
- (2) Organizator proizvodnje ili obrađivač duhana obavezuje se da otkupljuje duhan od proizvođača duhana u skladu sa propisanim jedinstvenim mjerilima člana 14. Zakona o duhanu.

Član 16.

(Vrijeme otkupa)

Organizator proizvodnje ili obrađivač duhana obavezuje se da od ugovarača proizvodnje otkupi sav duhan koji je proizveo, i to najkasnije:

- a) duhan tipa virdžinija do 15. novembra tekuće godine,
- b) duhan tipa berlej najkasnije do 31. januara naredne godine, i
- c) duhan tipa hercegovački ravnjak do 31. januara naredne godine.

Član 17.

(Obavještenje o mjestu i vremenu otkupa, odnosno predaja duhana)

Organizator proizvodnje ili obrađivač duhana obavezuje se da obezbijedi odgovarajući prostor za otkup duhana, kao i da obavijesti proizvođača duhana o mjestu i vremenu vršenja otkupa, odnosno predaja duhana.

Član 18.

(Procjena prilikom otkupa sirovog duhana)

U skladu sa članom 15. Zakona o duhanu, organizator proizvodnje ili obrađivač duhana dužan je da, prilikom otkupa sirovog duhana u listu, vrši procjenu proizvođaču duhana, na način kako je to predviđeno Zakonom i drugim aktima.

Član 19.

(Prijava proizvodnje)

Organizator proizvodnje ili obrađivač duhana obavezan je da izvrši prijavu proizvodnje nadležnom organu najkasnije do 15. jula tekuće godine.

Član 20.

(Kontrola duhana na parcelama)

Organizator proizvodnje ili obrađivač duhana, kontinuirano, tokom čitavog procesa proizvodnje, preko svojih stručnih službi, i uz obavezno prisustvo proizvođača, evidentira datum kontrole i činjenično stanje na parceli.

Član 21.

(Procjena prinosa sirovog duhana)

- (1) Organizator proizvodnje ili obrađivač duhana, na osnovu člana 13. Zakona o duhanu, uz prisustvo i saglasnost proizvođača duhana, u toku vegetacije, a najkasnije do 30. septembra tekuće godine, vrši procjenu prinosa sirovog duhana u listu koji se očekuje.
- (2) O provedenoj proceduri, u skladu sa stavom (1) ovog člana, obrađivač ili organizator proizvodnje obavezno izdaje Potvrdu o procjeni prinosa sirovog duhana u listu proizvođaču duhana, u skladu sa zahtjevom sadržanim u članu 15. stav (3) Zakona o duhanu.

"Službeni glasnik BiH", broj:51/12

Član 22.

(Forma i elementi evidencija)

Forma i elementi koje sadrže evidencije iz članova 5, 19, 20. i 21. sastavni su dio Pravilnika o sadržaju obrazaca i načinu vođenja registara, u skladu sa članom 37. Zakona o duhanu.

POGLAVLJE V- PRIJELAZNE I ZAVRŠNE ODREDBE

Član 23.

(Usklađivanje uvjeta za obavljanje djelatnosti proizvodnje duhana)

Proizvođači duhana koji su u trenutku stupanja na snagu Zakona o duhanu obavljali djelatnost proizvodnje duhana dužni su uskladiti uvjete za obavljanje djelatnosti proizvodnje duhana sa odredbama ovog Pravilnika u roku od šest mjeseci, računajući od dana njegovog stupanja na snagu.

Član 24.

(Stupanje na snagu)

Ovaj pravilnik stupa na snagu osmog dana od dana objavljivanja u "Službenom glasniku BiH".

VM broj 79/12
10. maja 2012. godine
Sarajevo

Predsjedavajući Vijeća ministara BiH **Vjekoslav Bevanda**, s. r.